



Jane ali mugiredi ya 3. Asangalile khusoma mukilasi embya. Mwalimu wewe bali Madamu Malaria. Jane kasima mwalimu wewe.

Mwalimu kamusomesie Jane khukhwama nakengila musikuli sia Makutano. Kumwaka nio abele kuchaka. Madamu Malaria asomesianga babana bibindu bikenii.

Bamurekeresianga bulayi. Abasomianga kimienya kimikeni. Lundi abakanilanga chingano chingali. Buli omundu musikuli alikho aloma kamakhuwa ke bulwale bwe kamakana.







Buli omundu alikho  
aloma khu bulwale  
bukeni. Bulwale  
buno bali Korona.  
Babandu babulanga  
bali COVID-19. Buno  
buli bulwale bukeni.  
Madamu Macharia abele  
akhababolelakho basomi  
bewe bulwale buno tawe.

Babalimu bosi  
balikho bakachulakho  
COVID-19, bulwale  
bukeni. Basomi balikho  
bakachula khu blwale  
buno bwa COVID-19.  
Basasi bosi engo  
beyendekhelele bulwale buno.

Babandu balikho bakachula khu bulwale buno khubirira  
muchisimu chabwe. Chiredio chosi chilikho chibolela  
babandu bulwale bwa COVID-19. Chitivi chilikho  
chilosia lulumbe lwa Korona. Omuruki omukhongo  
we lirambo yesi alikho akachula khu bulwale bwa  
COVID-19.





Babandu bakali abele bamanyile makekhe ka COVID-19. Balala bapara bali sabuli bung'ali tawe. Baloma bali COVID-19 seliwo tawe.

“COVID-19 eli ehoma ya buli lwosi,” balala balomaloma.

“Sino sili sikhhololo nisio khwanala, sisicha nasiwao. Sakhukhoyebwe khuburia tawe,” Babandu babandi baloma.

Balio babandi nabo bapara bali COVID-19 sili silamo khukhwama khu Wele Khakaba.





Endalo ndala omuruki omukhongo we lirambo katangasia ali bulwale bwolile Mukenya. Baloma bali omundu mulala kaambisibwe bulwale burisia lukali.

Babandu boshi baria. Bulwale bwachaka khutamukha nga kumulilo kwe mumusiru. Babandu bakali mulirambo banyola covid-19. Balalakho bafwa khubela bulwale buno.

Kamalaka kamakali kechao ke babandu khulonda. Kamalaka ke khukhingilila bulwale bukhutamukha buli abundu tawe. Bikuli bioshi biekalwa. Jane nende babasie sabacha esikuli tawe.





Covid-19 buli nende chisaini chingali. Babandu bali nende luluya lukali mwibili bakhoyele bache mwosibito. Bosi bakholola benyekhane bache babone dakitari.

Babandu bali nende busiro bwe khuela bulayi, bakhoyele bache mwosibito.

Babandu banyalala nende kumukongo khuchuna bosu bakhoya bache babone dakitari bwangu.





Lusakia lwimelela bulamu lwakelekele babandu bakali kamalaka kamakali. Khukhololela sie khumbo lili lilaka lilala.

Babolela babandu barumikhile sitambala sie limila nebaasimula. Bakhoyele basinge sitambala esio nende esabuni.

Bakania babandu khuamba kimunwa, chimoni nende kamolu khurumikhila kamakhono kamachafu. Kamalaka kano kosi kaba ke khukhingila lulumbe lwa Korona.






Babandu bakhoyele khusaba kamakhono nende kamechi kachiririkha. Khusaba kamakhono khukhingilila efwe khunyola lulumbe lwa Korona.

Omundu narura mungo mwewe akhoyele asabe kamakhono. Buli omwana yesi yesi akhoyele khusaba kamakhono kewe lukali.

Buli omundu engo abele asaba kamakhono endalo yosi. Fwesi khukhoyele khukhwikha nende Covid-19.






Kabali kamechi sekaliyo tawe babandu bakhoyele khurumikhila sanitaiza khusinga kamakhono. Babandu bakali sebasima elafu ya sanitaiza ta.

Babandu bakhanya khusanitaiza ta bakhoyebwa khusaba kamakhono khurumikhila esabuni nabakhengila mwituka tawe. Bakusi bosu baakikisia bali bandu balonda kamalaka kano.

Bakusi balala sabakusia mwituka nabakhasabile kamakhono tawe. Baria bali khuno khunyala khwakila Covid-19 yaamba bakusi bosu.







Babemelesi be lusakia lwe bulamu baana kamalaka. Abundu wosi wosi nio omundu atila akhoyele asingwe bulayi. Okhuno khwayeta khukhingilila lulumbe lwa Korona lulera COVID-19 nekhukhila khutamukha.

Baloma bali kamatoka kosi ke khumema babandu kakhoyele bakafue kamalesi. Kamatoka ke khumema babandu kakhoyela khumema babandu batiti, nio mbo babandu bakhaba bakali mumatoka tawe.

Kamalaka kano kayeta bakendela mumatoka khulekha khuria. Kalaa, kalaa babandu bechula mumatoka lundi.





Covid-19 yachilila khutamukha Mukenya. Babolela babandu khufwara chimasiki. Babandu bakali baria khubona babandu nende chimaski.

Babolela babandu bafware chimasiki bulayi. Emasiki ekhoyebwe khufunikha kumunwa nende kamolu. Covid-19 nekhecha tawe abele badakitari bong'ene bafuaranga chimasiki. Lelo buli omundu afwana dakitari.

Babandu bachaka khung'ona chimasiki chabwe babene. Baandika kamakhuwa lukano ne lukano khu chimasiki echecho. Balala baandika bali” Wele Khakaba kachusima,” “Nasima Kenya”, “Khakhukhingilile Covid-19,” ne kakandi kamakali.






Babemelesi be lusakia lwe bulamu balaka buli omundu asikale engo. Babemelesi babolela babandu bakhekhala niyo bandu bakali bali tawe nio mbo bakhingilile Covid-19.

Bikuli biosi biarama bikale. Babandu bakholanga kimilimo muchiofisi babolelwa khukholela kimilimo engo. Bakania babandu khukhwikhala simbi nende babandu babandi nebali mubandu bakali.

Bakania babandu khukhesiana mumakhano. Lilaka lino liarura khukhingilila khuambisiana lulumbe lwa Korona.






Bise biosi bikuli biarama bibikale. Jane nende babasie baba nende ekhabi. Mwalimu wabwe madamu Macharia kaama musirekere siabwe.

Muchindalo chingali che khuola, kabarerera eredio basomi bano. Barekeresia eredio khumuinda kwa Edu Channel Radio.

Madamu Macharia kabakelekela kamasomo babana bano. Basomi babandi be bikuli bibindi bosu becha nabarekeresia eredio. Bosu basima kamasomo ka mwalimu. Basasi bosu basangala.





Balio basomi babongelela kamasomo khukhwama khutivi ye Edu Channel. Babao babalimu lukano ne lukano be kamasomo kaukhane.

Basomi bakali sebamanya kamasomo ke mukilasi yabwe kecha bise si. Balola kamasomo kosi. Mala beyika kamakali.

Abulala mwalimu we etivi karebanga basomi kamarebo. Baandika kamachibu mubitabu biabwe. Basomi bosu basima babalimu bakeni.





Balio basomi babandi balondelela kamasomo khuchisimu. Bachiba kamarebo ke kamasomo.

Bikuli bilala biawelesia basomi kamasomo ke mulusimu. Nibo, bikuli biaba bikale nekakhali bitabu biasikala bibambule.

Bilio bikuli bisomia basomi kamasomo khubirira lusimu. Basomi basima kamasomo ako lukali. Baloma bali kamalayi po!





Atiti ari chindalo chindeyi che khuola chawa. Bekula bikuli. Abele bise bikali basomi nababa esikuli.

Basomi basangala khukobola esikuli. Babalimu bosu basangala khukobola esikuli.

Bibindu bikali biakalukhana. Babolela basomi bosu khusaba kamakhono nabali esikuli. Bakhoyebwa khupimwa luluya lwe kumubili. Basomi bakhoyebwa khukhwikhala sino nende babasie.

“Mala babalimu balaulila nakhuchiba kamarebo nende emasiki khumunwa?” Jane kereba.





Lumalilisi yabao embakha endayi. Echanjo ya Covid-19 yanyolekhana. Babandu banyola echanjo eyo sabaumia nende Covid-19 tawe.

Babandu bakali bacha banyola echanjo. Babemelesi be lusakia lwe bulamu, basikari, babalimu baba be khuranga khunyola echanjo.

“Olambila sesi bamelesie echanjo ya COVID-19?” Jane kareba mayi wewe.

“Tawe,” mayi kachiba.

“Khulondekhana nende kamalaka ke bubwimelesi bwe lusakia lwe bulamu, echanjo eli ye babemelesi be lusakia lwe bulamu, basikari, babalimu nende bakofu,” mayi katasakho.

Bulwale bwa Covid-19 sabwachile tawe. Bwerire bakali. Bakali barire bulwale buno. Jane ali ne lisubila mbo bikuli sebikhekale lundi khuchindalo chingali tawe.

